



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Visitatio Episcopalis, Illvstrissimo Et Reverendissimo
Principe Ac Domino, DN. Theodoro Adolpho, Episcopo
Paderbornensis, Sac. Rom. Imperij Principe, & Comite in
Pyrmont, &ct. per Ejusdem Civitatem & ...**

Frick, Bernardus

[S.l.], 1654

Indictio Visitationis Episcopalis per Civitatem et Dioecesin
Paderbornensem, Cum Plenariis Indvlgentiis S.D.N. Innocentii PP. X.

urn:nbn:de:hbz:466:1-8088

INDICTIO
VISITATIONIS EPISCOPALIS PER CIVI-
TATEM ET DIOECESIN PADERBOR-
NENSEM,

Cum

PLENARIIS INDVLGENTIIS

S. D. N.

INNOCENTII PP. X.



THEODORVS ADOLPHVS Dei
gratiâ Episcopus Paderbornensis, S. Rom.
Imp. Princeps, & Comes in Pymont, &c.
Omnibus ac singulis, Abbatibus, Præposi-
tis, Decanis, Abbatissis, Prioribus, Archi-
diaconis, Capitulis, Conventibus Cathedralis & Collegia-
tarum, Regularium & secularium Parochialiumque Eccle-
siarum & divinorum Rectoribus, toti que Clero, per Ci-
vitatem & Dioecesin Nostram Paderbornensem, ubilibet
constitutis, salutem in Domino sempiternam.

Inter cetera, quæ à sacra & œcumenica Tridentina
Synodo, salubriter Spiritu S. dictante, sunt ordinata, illud
haud minimum censendum est, quo Episcopis per suam
cuique Dioecesin, necessitatem annuæ visitationis Episco-

palis sess. 24. de reform. c. 3. per se ipsos, vel ipsis legitimè impeditis, per alios ad hoc muneris delegatos, faciendæ, tam seriò ac severè imponit, ut sic vultum sui pecoris diligentius cognoscentes, si quæ sint emendanda vel renovanda, in meliorem statum, non minus ad maiorem DEI honorem, evidens Ecclesiarum incrementum ac utilitatem, ad animarum sibi concreditarum salutem, ad Ecclesiasticam disciplinam restaurandam, promovendamque, reducere paterno affectu, cum cura & sollicitudine satagant, quam ipsimet etiam ad rationem supremo Pastorum Pastori CHRISTO IESU, de commisso sibi grege reddendam, melius efficaciusque præparentur. Quod cum hætenus ab Antecessore Nostro laudatissimæ memoriæ, ob bellorum tumultus & terrores, & à Nobis, propter gravissima Imperij negotia, aliaque impedimenta, fieri non potuerit, nunc tandem, exigente summâ rerum necessitate diutius nequaquam duximus esse differendum. Nos itaque dicti S. Concilij decretis in hærentes, pro officij Nostri Episcopalis ratione, per præfatam Nosram Diocesin, Visitationem Episcopalem generalem, indicimus, quam volente ac favente DEO, ipsa Dominica sub octava Corporis Christi, quæ erit septima mensis Iunii, aggrediemur, & perficiemus. Visitabimus autem accuratè omnes & singulas Civitatis & Diocesis Nosræ Ecclesias, Cathedrali Nosram, Collegiatis, etiam Nobilium Virginum, earum item Capitula & personas, Curatas præterea Ecclesias, item eas, quæ Cathedrali, Collegiatis, aliis Ecclesiis, Monasteriis, aut piis quibusvis locis, quovis modo annexæ sunt; Monasteria item, Abbatias, Prioratus & Præposituras, quovis nomine nuncupatas, in quibus non viget regularis observantia; Cetera quoque beneficia curata

ac non curata, secularia, regularia, quovis modo commendata.

Moniales etiam sive Sanctæ Sedi Apostolicæ immediate, sive regularibus subjectas quoad clausuram, ad quam conservandam, vel ubi violata fuerit, diligenter restituendam, sub obtestatione divini Iudicij, & interminatione maledictionis æternæ, juxta S. Concil. Trident. decretum, sess. 25 c. 5. de Regularibus, obligamur.

Monasteria insuper omnia, in quibus animarum cura exercetur, in iis, quæ ad Sacramentorum administrationem pertinent. Omnes denique & quascunque seculares personas Ecclesiasticas & Regulares extra Monasterium vitam agentes, prouti Hospitalia, aliæque loca pia, ad cultum divinum quovis modo deputata.

Quapropter vos omnes & singulos supradictos, ad quos Collegiorum, etiã Nobilium Virginum, Monasteriorum, Parochiarum, Vicariarum, Beneficiorum, Hospitalium & piorum locorum quorumcunque, vel foundationum gubernatio, vel administratio, Missarum, quæ in iis præstanda, celebratio, aliorumque munerum injunctio, quomodolibet pertinet, in Domino hortamur, & seriò præcipimus, ut quo die singulas Ecclesias ac loca ad ea spectantia visitaturi sumus (de quo adhuc singulos locorum Superiores ac Pastores debjtere præmonebimus) Nobis, vel Nostro Vicario generali, aut cui tale munus delegabimus, singula respectivè proferatis, disponatis, conficiatis, consignetis, & exactè observetis, quæ sequentibus articulis, in compendium per monita generalia & specialia, ad celeritatem, exactioremque visitationem redigi, describi ac imprimi mandavimus. De reliquo Authoritate Apostolicà omnibus verè confessis, & sacrâ communionem refectis, sub

hac futurâ visitatione Nostrâ, plenariam omnium peccatorum indulgentiam, & gratiam Nostram offerentes, Episcopalem benedictionem benignè impertimur. Datum in solita Nostra Episcopali residentia Neuhaus 28. die mensis Aprilis anno Christi M. DC. LIV.

Theodorus Adolphus.

L. S.

v.

Bern. Frick Episc. Card. Suffr.
& Vicar. Gen. Paderb.